

Jangan pinggirkan nelayan

Sinar Harian 6/10/2019 m/s 19

Harap kerajaan
pertimbang
semula bantuan
terhadap
golongan itu

NORHASPIDA YATIM

KUALA TERENGGANU

Persatuan Nelayan Negeri Terengganu (Penentu) berharap Belanjawan 2020 yang akan dibentangkan kerajaan pada 11 Oktober ini tidak meminggirkan golongan itu.

Pengerusi Penentu, Mat Yassim Mohamed berkata, pihaknya menaruh harapan tinggi agar kerajaan Pakatan Harapan (PH) dapat meneruskan bantuan sedia ada serta mempertimbangkan semula peruntukan terhadap golongan itu kerana tidak mendapat perhatian dalam pembentangan Belanjawan 2019.

"Kita amat berharap ada berita gembira yang akan dibawa kerajaan dalam pembentangan Belanjawan 2020 nanti.

"Kerajaan diharap tidak meminggirkan nasib dan kebajikan nelayan yang perlu mendapat pembelaan sewajarnya memandang tiada langsung perkara yang disentuh berkaitan kepentingan nelayan



Golongan nelayan berharap adanya berita gembira dalam pembentangan Belanjawan 2020 pada 11 Oktober ini.



dalam Belanjawan 2019 yang dibentangkan tahun lalu," katanya kepada *Sinar Harian* baru-baru ini.

Beliau yang juga Ahli Lembaga Pengarah Persatuan Nelayan Kebangsaan (Nekmat) berkata, kerajaan juga diharapkan supaya mempertimbangkan untuk menaikkan kadar elaun sara hidup bulanan nelayan daripada RM200 ketika ini kepada RM300 bagi membantu meri-



MAT YASSIM

ngikan bebanan yang ditanggung.

Mat Yassim berkata, sebelum ini elaun sara hidup nelayan sebanyak RM300 telah dikurangkan kepada RM200 selepas Pi-

lihan Raya Umum ke-14 (PRU14).

"Kita harap untuk bajet tahun depan kerajaan lebih cakna dan prihatin terhadap nasib golongan sasar seperti nelayan, petani dan penternak.

"Kita amat berharap supaya elaun kos sara hidup nelayan daripada RM200 sekarang dapat dinaikkan kepada kadar asal RM300 seorang.

"Ia sekurang-kurangnya mampu membantu untuk meringankan beban yang mereka tanggung ekoran kenaikan kos sara hidup yang tinggi masa

kini," katanya.

Dalam perkembangan sama, beliau berkata, kerajaan juga diminta mengekalkan kadar subsidi diesel dan petrol bagi membantu golongan itu.

"Kita harap kerajaan dapat mengekalkan subsidi petrol dan diesel yang telah disalurkan sebelum ini kerana ia amat membantu menjana pendapatan golongan nelayan yang bergantung sepenuhnya kepada hasil laut.

"Ia juga bagi menjamin kesinambungan golongan ini pada masa akan datang," katanya.

Pertimbangkan semula bantuan musim tengkujuh

KUALA TERENGGANU - Golongan nelayan berharap supaya kerajaan dapat mempertimbangkan kembali pemberian bantuan musim tengkujuh menerusi Belanjawan 2020 yang akan dibentangkan nanti.

Ahmad Syawal Fitri Ahmad, 18, dari Kampung Pulau Duyong di sini berkata, bantuan itu dapat mengurangkan bebanan ditanggung nelayan sepanjang tempoh tidak dapat keluar ke laut pada musim itu.

Menurutnya, golongan nelayan agak kecewa kerana

Belanjawan 2019 tidak menyebut secara khusus bantuan yang akan diberikan kepada mereka.

"Kalau boleh kita harap kerajaan kekalkan bantuan sedia ada dan dalam masa yang sama mempertimbangkan semula bantuan musim tengkujuh.

"Bukan semua nelayan boleh turun ke laut sepanjang masa, ada masa kita tidak boleh ke laut. Jadi dengan bantuan itu sedikit sebanyak dapat membantu kita menyara keluarga," katanya yang telah bekerja



SAIFUL HAMDAN

sebagai nelayan selama tiga tahun.

Senada dengan Ahmad Syawal Fitri, Saiful Hamdan Hamid, 41, pula berkata,



AHMAD SYAWAL FITRI

bantuan musim tengkujuh dapat membantu meringankan bebanan kewangan yang ditanggung kerana nelayan terpaksa 'bercuti' daripada

turun ke laut.

Katanya, tanpa bantuan itu, nelayan yang menghadapi fenomena laut bergelora bermula Oktober hingga Mac tahun depan menghadapi kesulitan kerana hilang mata pencarian.

"Ada kena masa dekat tiga, empat bulan juga kita (nelayan) tak dapat ke laut.

"Jadi, kita amat berharap kerajaan mengkaji semula untuk menyalurkan kembali bantuan itu kepada golongan nelayan yang terjejas pada musim tengkujuh," katanya.



REAKSI
Kerajaan diminta pertimbangkan semula pemberian bantuan musim tengkujuh dan mengekalkan elaun sara hidup nelayan kerana golongan ini amat terjejas ekoran kemasukan nelayan asing yang menceroob dan mencuri hasil laut di negara ini."
- Ahli Lembaga Pengarah Persatuan Nelayan Dungun, Bahiyuddin Awang Harun



Kita berharap kerajaan dapat memberi perhatian terhadap nelayan dalam pembentangan Belanjawan 2020 kerana golongan ini amat terjejas terutama akibat kemasukan nelayan asing yang mengaut hasil laut kita."
- Wan Abdul Halim Wan Husin, 51, Kg Seberang Baroh, Losong



Kita harap kerajaan dapat pertimbangkan pemberian elaun sara hidup dan bantuan musim tengkujuh kepada semua nelayan kerana pendapatan golongan ini agak terjejas terutama pada musim tengkujuh."
- Mat Amin Jusoh, 55, Chendering, Kuala Terengganu